

異稱日本傳

中之四

リ 5  
2260  
7





伊藤  
2260  
卷

岡田  
齋

異稱日本傳中之四引用書目  
閩書

異稱日本傳卷中四目






閩書崇禎四年熊文燦序曰今日疆場固不專事西北而兼在東南閩馮山阻海上郡接壤東粵萑苻所藪潢池盜弄往往見告三山以南列郡星羅于滄波浩淼之側昔患倭奴云今按閩書者明黃仲昭始創為之何喬遠成編志八閩事也詳見福清向高序全部摠百五十四卷其間往往記日本事足識古今事變故抄出如左

閩書卷之三

方域志

福州府 侯官縣

臥龍山條有安國寺偽閩時僧師備自雪峰來居館徒千人高麗日本亦有至者師備已見雪峰山有箋經臺宋大中祥符中僧可度箋楞嚴經於此夏竦記其事





又卷之四

方域志

福州府 長樂縣

利充山 山有高麗王祖墓王名宜星其父元末任宜州判官生時星墜庭中因以為名父卒高麗王入貢見而器之遂從王歸王後無子因以為嗣乃襲王矣按高麗王父在元末王入貢當在皇朝高麗國朝貢其王皆易名與國中本名異亦不知宜星國史所載是何王也又高麗道入遼海不應出閩抑從日本來耶

又卷之六

方域志

福州府 福清縣

福廬山 條 皇明戚繼光大破倭於此又三十里為化南化北二里隋時掠琉球五千戶居此化里則皇朝大學士葉向高之鄉

龍江 舊名 驟文江後改名龍江上接龍首河源下通東南渤澥橋曰龍江皇朝嘉靖中倭蹂閩大學士葉向高方襁褓其母夫人舉家遠避時夫人襁向高行憊甚忽有老人謂曰吾代若襁先趨而待於龍江之橋母夫人不聽其舅曰事近矣且夫當此時也而為人襁兒必長者也遂解與之次日至橋則老人已先在問姓名卒不告尋失之

今按葉向高嘗著蒼霞草第十九卷有日本考

又卷之七 方域志

泉州府 晉江縣



澎湖嶼 萬曆中於此屯兵防倭也

又卷之十二

方域志

泉州府 同安縣

嘉禾嶼 與在海中去縣七十里在其南以嘗產嘉禾名又  
名廈門又名鷺嶼今中左所在其中防扼海門險地也嶼廣  
袤五十餘里洪濟山最勝上有方廣寺有雲頂巖日出可望  
日本

又卷之三十

方域志

福寧州

羅浮山 與水灣山相連泊船可避北風若南風石岬齒齒

矣今防倭水寨船多集其地

又卷之三十二

建置志 福州

福州郡城 條 嘉靖三十八年設倭備增置外敵臺三十六環  
城三面塹濠廣之延袤三千三百四十六丈有奇子城之門  
七 云

社稷壇 在郡北天王山下舊在城南七里竝城以西 云 國  
初令府州縣得祀境內山川其後又令風雲雷雨并城隍合  
祭壇一設位四中祀風雲雷雨之神左祀府境內山川之神  
右祀府城隍之神悉向南日本琉球淳泥山川之神祀西隅  
東向歲春秋二仲上巳日布政使率諸司泣祭如社稷禮  
今按社稷壇祀我及外國山川之神其敬至矣 西白



防倭廣五里門五南曰陽春北曰拱極東曰鎮海西曰清江  
西南曰平政水關五三十七年增置敵臺十有三四十年鑿  
濠  
羅源縣柵條嘉靖三十七年巡撫王忬檄推官徐必進拓之  
以防倭延袤三里許闢門四東曰賓日西曰承金南曰阜薰  
北曰朔易敵樓四水關三萬曆七年分巡僉事李樂砌以石  
又卷之三十七

建置志

東洋行縣在十五都嘉靖辛酉倭變作東洋民乘亂肆掠  
功德祠在縣治左祀都督戚繼光以平倭功  
又卷之四十

扞闔志

洪武二十年命江夏侯周德興入福建抽兵防倭移置衛所  
當要害處德興抽兵五千餘人築城一十六增設巡簡司四  
十五分隸諸衛云嘉靖四十二年以閩中連歲苦倭議設  
總兵鎮守春秋二季駐福州夏冬二季駐鎮東設五寨欽依  
把總云

嘉靖戊午倭泊浯嶼入掠興泉漳據之一年廼去巡撫譚  
綸總兵戚繼光請復寨舊地尋復以孤遠罷萬曆三十一年  
有夷舟至泉城下不覺當事者因移建郡東之口湖是去郡  
三十里不禦門戶守堂奧矣

嘉靖李海寇許朝光吳平等據為巢穴勾倭內訌罷敵二省  
數年廼撲滅之  
又卷之四十四



文蒞志

虎都鐵木祿好讀書與學士大夫遊至元末為福建行省郎中延祐中大臣以浙東倭奴商舶貿易致亂奏遣宣慰閩浙撫戢兵民海陸靜謐

又卷之四十五

文蒞志

阮鶚桐城人嘉靖甲辰進士倭寇東南無寧歲侍郎趙文華奏請置撫臣於閩從之於是鶚以邊才得名自浙江巡撫都御史改福建福建有巡撫自鶚始其時軍府草創兵食俱誑倭以數萬眾攻會城勢且岌岌鶚且戰且守卒以却倭未幾為流言所中去

劉燾字仁甫天津衛人嘉靖三十九年代王詢為巡撫時倭

寇頻歲焚掠其年三月鳩眾數萬繇南臺寇福州燾素有威名善騎射走及奔馬下令大開城門往來不禁親率死士千餘邀賊閩安鎮身發三矢中其三酋應弦而斃賊大奔潰赴水死者無算凱旋之日士民歡迎馬首無何復出軍禦倭長樂之北鄉遇賊壺井山下手射二酋賊駭潰遁去以病免倭復至閩人思之

游震得

倭之入寇也興化府政和壽寧福安寧德等縣皆被陷沒論者各震得懦縮不支

譚綸字子理宜黃人嘉靖甲辰進士以浙江叅政丁艱家居廣賊流劫江西起復勦平之改福建叅政乞終制亡何倭陷興化又起復綸以僉都御史巡撫本省綸至以精兵千人自隨斬倡亂衛卒責諸將必滅賊先後與都督戚繼光破倭境上復遣偏帥擊古田諸山寇悉平之凡俘斬二千二百有奇



獲被虜三千餘人，衛所印一十五章悉以功歸。前督府王詢是時詢方獲罪得藉以釋，晉副都御史復擒滅神前灣玻璃嶺諸孽及龍巖楊一蘇、阿普、藍松山等閩中賊悉平，得請補制。後以薊遼功陞右都御史、兵部尚書，卒贈太子太保，諡襄敏。

殷從儉，字汝中，臨桂人。嘉靖甲辰進士，轉巡撫閩中。在閩歲餘，值倭寇初殄之後，一以休息爲事。方倭至時，籍民丁田爲戍餉，名曰丁四糧六，每易一撫，臣輒增分數，卽歲殺必取盈。從儉悉復原制，省冗費，汰虛兵。

商爲正字，尚德會稽人。隆慶五年進士，福寧衛軍亂，縛指揮懸旗閉門，變告總兵某，函謁問計。爲正曰：「衛將暴衆，衆不勝，患犯上凌長，設至於斃，弗可赦，已衆知必死，而果於叛，嬰城。」

四掠窮且入海，今乘其初起，遣急卒持牒數指揮罪，而速擊之。若就戮者，衆快忿泄而怠於無辭，因開其告，愬必駢首赴訟。然後求首亂者，誅之，事卽解矣。總兵從其計，已果定舟師。戍海護倭百餘械，以獻將騰疏告捷，爲正駭曰：「倭非木人，朝遇敵，晡而擒之，格鬪移時，我卒無一創者，何也？」引至庭下問之，皆手擊地具言，本閩人商海所給文引爲將卒所奪，一因解行纏，則片紙名籍具焉。移檄驗之，果信，皆得釋。

又卷之四十六

文蒞志

汪宗元，崇陽人。嘉靖己丑進士，尋轉右布政使，外禦倭寇，內察民瘼。

又卷之四十八



文蒞志

卜大同字吉夫秀水人嘉靖十七年進士授刑部主事歷湖廣參議有平苗功再遷福建巡海副使輯備倭圖說畫戰守計終任無倭患

陶大年字長卿會稽人嘉靖二十年進士以南兵部郎出守吉安轉山東海道副使倭寇躡閩閩督臣請增設憲使一員專海事疏下吏部部請移大年閩中時軍府草創賊船出沒大年守福寧寇逼壘相拒累月去攻連江後發兵援擊多有斬捕

邵梗字良用仁和人嘉靖十七年進士任福建巡海道駐漳州時海禁廢弛奸民闖出入賈禍名寇處置失宜或激而愈亂梗下令曰凡賊臨陣捕虜與奸民爲賊間及違禁出物廉

有狀者殺無赦羅織相告言者勿詰於是反側帖然益濬隍增隄選卒厲兵徙四郊積蓄入城中使賊無所掠己未倭寇合兵萬人犯長泰選火藥手百人躡擊之賊宵遁又遣舟師攻海寇于月港銅山清浦諸處凡七克捕斬六百餘寇自月港掠舟入海將遞遣義士沈講率所部兵與官兵犄角邀賊舟于東磴以巨艦衝沈之擒斬二百餘溺死者無算寇盜悉平梗當師旅倥偬之時持以恬靜緩刑薄征節力省費大功竟集民不知擾

又卷之四十九

文蒞志

舒春芳字景仁鄱陽人嘉靖二十三年進士歷本省僉事分巡建寧揭白鹿洞規於晦庵之堂拳拳義利之辨以古君子



聲色貨利之戒爲戒且以勸勉人建有孝廉楊應詔志聖賢之學賓而禮之建奸民黠盜雄豪皆帖帖入把束倭亂海上建州告警春芳策馬登陴出輒載金帛自隨用以犒賞材勇激厲士氣鳩工聚鐵爲鳥銃懸金錢訓練之中卽與金民競習之無不技命中者及倭數萬攻城多歿於銃城得不破一日單騎督兵與倭戰赤岸橋兵潰僅以身免陞湖廣叅議梁士楚番禺人以舉人知詔安縣居官清勤才猷鍊達時值倭饒山海寇盜並起悉心經理調度兵馬糧餉船隻相機剿撫前後督調鄉兵擒斬倭賊千餘名撫散山賊鍾旺雷晚香等六十餘人又擒斬吳平海賊一千八百餘名撫散餘黨五千餘衆

又卷之五十二

文蒞志

福州府連江縣

向辰馬平人以舉人任時邑城初陷倭環其疆向辰百萬備禦城壞數十丈豎木柵補之一夜而戍賊皆駭屢攻不能破邑人德之前後令有功福清者向辰爲第一官終布政司叅議

又卷之五十四

文蒞志

盧仲佃字汝田東陽人嘉靖丙辰進士善爲民建白興除時倭寇猖獗有鎮曰安平人居稠衆故之城守仲佃與鄉紳柯實卿倡築上司以軍興乏餉議弓兵加征置官權稅洛陽橋仲佃再三爲民請命以拾遺調福安令時縣城新陷積骸彌



野仲佃改築城壕與民守之明年倭又薄城仲佃携三子時  
時登陴民益有固志擢南刑曹去泉福之民俱生祠焉  
林咸番禺人由舉人為尤溪教諭博學善教有訓尤錄遷知  
縣事嘉靖季倭破福清南下悉力攻惠咸與鄉士夫堅守亡  
何倭復由海道入咸并誓城隍趨鴨山往禦之不克而死贈  
府同知賜祠官一子

葉春及字化甫歸善人隆慶初授閩清教諭未赴詣闕上書  
三萬餘言云在縣四年擢守賓州忌者匿檄令不得赴拂  
衣歸後以薦召用歷官戶部郎中復上書請求日本論語孝  
經人益迂焉所著有綱齋集惠安政等

又卷之五十六

文蒞志

建寧府下

徐棻熟人繇進士仕南御史當南倭北虜猖獗之時極論處  
置防禦之法  
又卷之六十一

文蒞志

興化府

陳瑞龍字體乾潮湯人守郡時郡方被倭賊屢傳城下瑞龍  
令無論縉紳齊民家有丁徒力能勝兵者悉籍記之手編守  
陴又令城下游兵分更傳箭晝坐藍輿察之或徒步至夜則  
秉燭為微行扶其失陴者朱應春記其法甚詳也已母卒官  
舍撫按曰兵革無避禮也公善為城守

盧堯佐東陽人嘉靖中訓導郡中倭堯佐與城守城陷死之



又卷之六十二

文蒞志

興化府 仙遊縣

陳大有南海人蒞任旬餘倭方破莆乘勝以四千餘人從寧海間道薄城下西鄉叛民附之環城三匝大有諭衆曰吾誓與此城存亡敢遁者斬於是賑貧窮分部伍携二家僮宿城南樓晝不傳餐夜不帖席時時戎服單騎或徒步繞陴飭守外則重脩土城環以木柵簡閱精銳為遊兵巡邏城下賊來令堅劄土城內左右協擊之城上佐以矢石間絕死士乘其怠斫其營創流星飛鉤之制而賊之竹牌雲梯轉為所絀最後謀知賊造呂公車大車以來度所必歷處遣人墜礮插椿或暗洞土穴車至輒齟齬摧欵其他所有長技輒隨方破壞

前後相持五十餘日亡何戚將軍繼光提大兵至殺賊逐之仙邑竟全兩臺交疏其嬰城死守功仙人為保障殊勳錄紀之

又卷之六十二

文蒞志 興化府 仙遊縣

彭應麟字允禎華亭人以南刑部郎出知郡鋤豪翼脆敦實左華戢鹽商處容兵外禦倭寇內制山賊

吳國倫字明卿興國州人建寧府同知國倫左建寧清戎戢姦以弭倭亂

又卷之六十五

文蒞志



漳州府 南靖縣

龔有成嘉定人繇舉人任時值倭饒二寇發土寇乘之大肆劫掠有成繕浚壕經營防禦前後勦滅溪東小豕諸賊且著勞績

又卷之六十六

文蒞志

福寧州 福安縣

鍾一元秀水人以進士任州西郭無城一元營築六百餘丈為保障甫竣工倭賊至民殊賴之  
柴應賓鄞人以舉人任州方倭警一有事即橫派里甲強索舖戶吏綠為奸應賓一洗其弊女墻久圯僱工甫就倭忽至城賴以完

夏汝礪融縣人嘉靖初為南平教諭待士以誠賢愚僉益擢知南安縣縣故無城前一年為倭所掠汝礪集民城之計田出直計下出夫不二載工完未幾土寇褚鐸作亂率眾攻城堅不可入因督兵挫之九日山下秩滿擢福寧州知州復培州城之雉堞州賴以固

章文粹涇人嘉靖中以貢訓導問學淵邃善於說詩值倭警屬司城大開城門入避賊之衆倭來攻城萬數州守病屬文粹視事綜畫有方未幾觀歸諸奔送數十里

章弘信會稽人由知印丞隆慶初夏倭寇村落督兵生擒十八馘五級皆遁去

陸鵬慈谿人嘉靖中任典史捐俸造橋亭提兵剿倭  
程箕績溪人嘉靖中教諭嚴立教條學政一新明年倭入寇



箕守西門督兵力戰死之

李堯卿番禺人以舉人任政平訟簡民安其業倭犯城單弱無援堯卿與叅將王夢麟歃血盟衆賊有張車登陴者堯卿平旦其六七有進逃遁之策者立叱斬之併攻三日城陷死之贈太僕丞蔭一子

林時芳潮陽人以舉人任時邑方苦倭州里爲墟民匿山谷不返卽返夜驚復潛遁時芳多方招集綏撫流散至於刑誣賴弛鹽禁戮假倭平鄰猾創殘之後能使道不拾遺民心快焉

又卷之六十八

武軍志

閔賢光州人其先閔得洪武初以功任廣洋衛指揮同知永

樂中有聚者陞指揮使賢以成化中改任嘉靖末有溶者沈勇多智善擊劍倭寇入境將兵禦戰海上計十餘年斬獲千級功未上又與倭戰舟山火攻失利死焉

徐棠宿遷人洪武末祖榮襲永寧衛百戶永樂初陞福州左衛右所副千戶棠以隆慶初剿倭功陞任今襲

趙鑿安東人其先趙清洪武末調本所百戶以功陞副千戶至鑿嘉靖中以倭功陞任今襲

盧鼎臣全椒人其先盧茂洪武中以功陞右衛指揮僉事鼎臣嘉靖間以勦倭功陞指揮使歷官都司叅將今襲

王灝龍門人其先王政洪武末以功陞水軍左衛中左所副千戶至友永樂中調福州右衛中左所嘉靖中灝襲以倭功陞任今襲



夏啓賢合肥人其先夏信洪武中以功陞本衛右所副千戶  
景泰初以征沙尤功陞本衛僉事啓賢萬曆中併祖擒倭功  
襲授

戴棟壽州人其先戴贊洪武末以功授本所副千戶嘉靖末  
棟以征倭功陞任今襲

楊桂灤州人祖麟嘉靖中以征大同功陞本衛指揮使麟子  
湧以征倭功陞都指揮僉事桂隆慶初陞任今襲

劉仲恩丹徒人其先劉鑑宣德初以功陞本所副千戶仲恩  
嘉靖末以倭功陞任今襲

張灼海鹽人其先張維洪武初授河南衛百戶既字襲調福  
州中衛中所灼嘉靖末以倭功陞任今襲

朱忠全椒人其先朱官音保洪武中授本所百戶忠嘉靖末

以倭功陞任今襲

胡福來安人其先胡雄永樂初功陞河南衛指揮僉事洪熙  
元年調福州宣德初襲授本衛指揮使今襲高志守山後人  
其先卜兒罕忽力正統十四年以護駕功授指揮僉事天順  
中倒刺火調本衛成化間倭襲賜姓高嘉靖末有懷德者禦  
倭死事志守用父功陞任今襲

戴尚忠和州人其先戴順洪武中以功陞金鄉衛指揮僉事  
至宣宣德初調本衛成化中有昱者負將略長詩文任烽火  
寨把總建候湖亭以便行旅嘉靖末有洪者禦倭死事加陞  
二級萬曆中尚忠降襲

劉師琦壽光人其先劉勝洪武初以功授揚州衛副千戶永  
樂初調本衛師琦嘉靖中以倭功陞任今襲呼鶴來和州人



其先呼海洪武末以功陞保定衛副千戶永樂中調本衛隆慶初有良明者偉貌豐頤孟諸戚繼光奇其狀令督兵轉餉無後期屢於海上奏奇捷陞指揮同知發大砲沈巨寇曾一本船轉戰大捷陞本省叅將巨寇林鳳據澎湖出沒爲濱海患良明先登深入陞廣東副總兵本省都督僉事築鎮東城徙廣西大帥佩征蠻將軍印平昭州征府江賜白金文綺尋乞歸卒予祭葬贈驃騎將軍上護軍良明子鶴來任今職又卷之六十九

武軍志

泉州衛

王鑑沔陽人嘉靖中前後擒斬倭賊五百餘人陞廣東龍水守備歷遷福建泉漳水陸叅將截擊倭船二十餘隻累次殺

獲以千計授昭勇將軍署都指揮僉事分守福建南路叅將今襲

童乾震含山人嘉靖中任銅山水寨把總三十四年倭自福清縣海口登岫乾震承檄剿捕與其子養銳千戶白仁義士陳學書等領兵哨禦屢有斬獲福清人爲語曰軍中有二童倭賊且一空居旬日當道檄震爲前鋒刻期殲之乾震與養銳仁學書等奮勇直前抵東嶽山與賊交戰數十合斬擒十有一顆殺傷三十餘自辰至申殊不却退約指揮劉玠爲援而玠兵不至賊見勢孤湧出包圍乾震身被二鎗奮麾喝戰遂死於陣而養銳僅身免事聞命卽海口地方立祠祭祀子孫陞襲二級養銳遂得襲指揮使養銳嘗任南日山寨把總有擊沈海賊功以老退休子與藩襲復以養銳從父戰福清



時有擒斬倭首功未叙復加陞都指揮同知與藩  
唐海六合人永樂中繇平海衛調任擒斬倭賊有功子高楨  
嘉靖季襲舉武科亦有擒倭功今襲

歐陽深南安人嘉靖丁巳以後閩被倭害日慘壬戌復合叛  
民數萬發掘墳墓求貨贖屍人心洶懼深時以納級除授本  
衛提兵拒賊筍江從數騎直入賊中觀其虛實歸遣人諭以  
禍福賊率衆來歸者不絕深日以私財市牛酒犒賞之選其  
悍鷙者置左右不疑人皆感憤樂爲用嘉靖四十一年春率  
兵攻賊施思備等於東田鄉破走之遂進剿青陽陳村下衛  
等處其夏進攻江一峰諸賊于雙溪至于尾嶺山徑連破七  
寨復進兵英林潘逕等處擊退李五官擒殺韋老等遂追剿  
水田下浯等處斬獲倭賊百餘級乃遣人宣諭謝愛夫黃元

爵陳子愛等俱棄甲來歸散其黨萬四千餘人於是賊首蘇  
光祚康大福等聞風屬至獨江一峰李五官等遁據沿海擁  
衆尚有萬餘深遣人撫諭解散乃督千戶王道成百戶白希  
周分道追剿生擒江一峰李五官南蠻老施思備王二千李  
三直等百一十八人俘斬泉州市論功進行都司其年倭破  
興化城盡掠金帛出據平海衛伺舟出海軍府檄深應援兵  
次東蕭與賊戰斬首百餘級乘勝直進賊來援者衆深與部  
士薛天申周岳鎮等血戰益勵皆死之事聞詔立祠歲祀錄  
其子孫今襲

俞大猷霍丘人嘉靖三十一年倭寇浙直勢甚猖獗朝命以  
都御史王忬提督浙福以大猷爲浙江左叅將是時我中國  
人王直毛烈亡命入海爲倭嚮導大猷與叅將湯克寬入海



擊直直道復數以樓船破倭云四十一年福建山海寇無  
慮數十萬督撫游震得請以大猷控制全閩江廣湖數道朝  
命未下其冬賊陷興化城明年春大猷馳至贛與都督劉顯  
戚繼光剿滅之移鎮惠潮有倭二萬海賊吳平與通諸山寇  
亦起勅江廣福建三鎮撫臣偕大猷討平之

鄧起沙縣人歲乙卯浙直倭寇猖獗奉檄赴援大戰徐功山  
普陀蓮花洋羊山陽弋槁等處斬首十餘級爲通泰叅將王  
江涇陸涇壩之捷皆與俞大猷共事論功相亞其擄兵狼山  
方疏置舟師適倭寇百船突至城兵不滿四十艘攻沈倭船  
無數倭焚舟登岼犯白滿如臯復奮擊之擒斬幾盡

張養正寶坻人先世榮永樂中調右所百戶養正嘉靖季承  
檄戍興化南日寨之青山倭寇海上養正甫至戍卽遣其僕

守慶還家趣治縷絮爲戰裝具鬻皆產以募士兵守慶持絮  
若貲至戍而報倭至養正督軍禦之發五矢中三倭皆驚遁  
詰朝倭黨蜂出猖獗莫過軍士多以逃匿爲計養正叱之卽  
提衆往擊引弓射之倭性故悍雖激矢穿胸曾不退北反以  
前驅衆軍皆遁僅守慶追隨且射且卻賊刃逼身養正奮捷  
拔賊刀反斲賊右臂在傍者追至守慶抱賊請代呼天叩地  
情詞愴切倭亦不曉所謂遂斬守慶足斷其首併力逐養正  
養正傷足及臂尚張目瞭賊神色不變旣而首斷挺身如壁  
賊解去其衣甲居民逃賊栖匿山上者目睹情狀爲之慟哭  
聲震天地養正年方十九娶婦竟三月耳當道題請陞二級  
附祀衛民祠春秋配祭今世襲副千戶

張榮

閩書

人其先世洪武中有陳亡者封昭信校尉嘉靖中



倭船艤大岬登岫人情勾勾以崇武孤城斗絕第欲堅守榮奮身出禦之力戰陣亡賊亦遁去今襲

又卷之七十

武軍志

建寧左衛

賴榮貴本縣人兄榮華嘉靖中以義夫長官白戶領里兵往浙江征倭大破倭斬首十級收兵而餉賊奔至中烏銳死榮貴以榮華功蔭襲

廖安景東人洪武中父景山以進象歷陞副千戶因差違限典刑至安調衛五傳至芳有斬倭功陞本衛指歸同知未任今襲

又卷之七十一

武軍志

邵武衛

王源遵化人嘉靖三十八年奉檄守閩安鎮明年調兵攻剿濂海灣門倭寇奮勇接戰衝沈大倭船數隻追至海嶼海洋射殺倭將一人又乘勝追之於小蟹礁援舟後至力戰而死事聞許其子陞襲二級今襲

顧遠懷達人洪武間祖成累功陞指揮僉事至遠調本衛數傳至斌正統末鄧茂七寇漳圍城斌時以把總防倭海上分遣諸軍護海上城寨自率水軍五百歸擊賊云擢福建都指揮僉事奉勅備倭斌死漳人無貴賤樂賻而葬之黎春合肥人歷守汀漳擢北路叅將破倭福寧衝沈其舟焚溺不計數擒獲泉賊潘若海江一峰二酋悉定泉寇



吳真廬州人父昇乙未從軍洪武初陞正千戶真替職洪武二十七年繇觀海衛調本所四傳至清嘉靖三十一年領兵征倭古縣生擒賊首馮春陳乾六等力戰死之今襲

又卷之七十六

英舊志

縉紳

蔡海永樂十四年任象山教諭倭寇犯境人民伏匿海獨正襟危坐少頃寇至海指罵曰醜徒自當稱貢中原敢寇擾耶賊刺之海罵不絕死

又卷之八十

英舊志

縉紳

項志德字尚之云出為四川參議云倭夷入寇福清城破志德子為所虜志德方奉表入賀萬壽聞之即上疏乞歸

諸縉紳在京師者莫不厚餽志德使歸贖兒悉却不受或謂君清尚固爾愛子被虜贈君贖之諸公厚意也志德曰吾已不仕諸公憐我當不責報第因難為利則不敢耳未幾子亦得歸

又卷之八十七

英舊志

縉紳

泉州府

晉江縣

王用汲字明受為郡諸生時郡困倭賊所召募客兵橫肆市中徒飽餼餉會御史按泉用汲入為御史言狀郡守恚之曰何與諸生用汲曰范希文自做秀才時便以天下已任矧鄉井事諸生無涉耶

又卷之八十八



英舊志

泉州府 南安縣

黃養蒙字存一舉進士第嘉靖戊午倭寇大掠燬廬舍令夏汝礪主議建城養蒙力贊之

歐陽模字宏甫父深以擒倭陣亡贈昭毅將軍見武軍志又卷之九十四

英舊志

魏良臣字以忠隆慶中舉進士令崇明邑有倭警民復相率為奸設法平之

又卷之一百三

英舊志 縉紳

延平府沙縣

謝應元字長卿令定安邑近倭寇時困城月餘設法防禦賴以晏堵

林騰蛟字士材補任休寧邑故無城會倭夷倡亂力建議創築

又卷之一百九

英舊志 縉紳

林富字守仁正德中以進士授大理評事云日本貢夷素驕蹇館于郡中時其廩餼約以禮分夷悉感服

又卷之一百二十四

弁韜志

興化府 仙遊縣

龔騰霄武試三捷嘉靖四十二年倭攻僑遊城騰霄被軍門



取用設策督兵穿圍救守城賴保全

又卷之一百二十六

英舊志 常布

福州府 閩縣

鄭靜夫郡諸生也少孤家貧所得束修悉充母甘旨嘉靖季邑有倭寇靜夫負布囊納神主奉母出逃至鳳岡山中遇寇棄其二子獨負母一賊創靜夫右臂去之忍痛至水碓橋既寇大至索金見囊空併欲殺母靜夫空手衛母泣告寇家貧母老殺我足矣寇刃靜夫右臂臂落猶以左肱扶母尋仆于地母坐守一夜靜夫乃死後賊退族人收骨葬之而二子不知死所矣

鄭天挺邑諸生也嘉靖間倭寇閩天挺居邑鳳山母喪在殯

衆出避賊天挺獨守柩賊至索金天挺拜且哭貧無金也所不去者爲母柩耳寇欲舍之向導者誘令殺之并焚其柩又卷之一百三十一

閩卷志

福州府 閩縣

陳繼思嘉靖末倭寇猝至鄉人皆逃匿繼思父母老疾獨侍不去寇憐而舍之舟覆溺百餘人繼思悉收瘞之路得遺金捐入里社弗取也卒年可百歲  
謝介夫故掾也好勇喜俠嘉靖季倭屯福州南門外且暮酒酣皆荷戈寢介夫結死士欲夜襲其營時巡撫意在和倭乃痛箠之介夫既挫村野居民雖得賊首級無敢報矣其後巡撫被罪去有司復遣介夫追賊竟與戰死而福清有夏叔慎



者亦死之

陳言邑掾也嘉靖季倭寇縱橫請放被虜八十餘人憤誅納無策土便宜七事啣大府命入壘諭賊賊皆開心回面至爲抵頽他賊以報功上得掾臬司以母老竟棄去

伍民憲安平鎮人嘉靖戊午倭至扶父際會逃反遇賊民憲長跪曰勿驚吾父餘任君欲賊不聽刃其父民憲挺身殺二賊又傷數賊後隊至落其右手臥草中一手荷戈口喃喃呼父三日乃絕至今煙雨中見道傍有男子荷戈立者人輒合掌呼孝子而過

黃元謙嘉靖間泉中倭無良之民相煽爲盜永春南安人呂尚四陳子洪兄弟等剽掠鄉社而有赤鬚兒者跳而往從赤鬚兒元謙從弟也元謙伺其潛歸執之會族告祖質以大義

投之水中已出之所以自預凶具殞殮之曰死之爲其作賊殮之者以我弟也子洪兄弟聞之擁衆至執元謙痛捶之元謙不服細致壘中露刃劫之元謙瞋目曰寧死肯從賊乎子洪兄弟亦投元謙水中

邵棟守禮耽書史嘉靖中倭陷城棟出穀賑民凡遇凶年減價零糶貧戶調助遍於族里

張德雅負義氣膽力過人嘉靖間倭攻縣城城中死守相去三越月倭造天車高與城等一倭跳入手舞大刀衆驚走德奮勇前斬之餘倭不知也相尾闖上者五六人德手不停刀尋擲火藥燒之明日賊不敢近止以銃彈遠擊德不避險竟爲流彈所斃倭亦解去松人祠祀之

又卷之一百三十二



英舊志 閩卷

汀州府 長汀縣

戴倪歲饑稱貸遠糶煮粥以濟貧人妻唐脫簪珥佐之夜半夫婦乘此舍未炊起假其釜錡大爲粥且拂坐滌器迓來食者齒序堂上無敢僑泄賤者丐者病者散置別屋恣食不爲量唐主女若婦亦無所惜遠近悅其齋邀日一再餐凡數百人兩月乃已後十一年孫科登第則有神授夢於主司曰此積德家子宜錄之又六年倭寇將火其宅係纍者羣泣曰幸無焚我施粥公居倭嘆不止復書壁戒後至者卒年九十六唐齊筭焉

陳廷聲嘉靖辛酉率鄉兵應募與倭奴力戰于南郊死之常白郡掾也嘉靖辛酉自縊西門下伏莽射倭倭斫其首去

陳主亮性長厚好行德每訓其子澄渙熙輒歎曰安得世無分異如古張陳哉嘉靖壬戌熙死于倭澄號天咬指出血遂得熙亂屍中抱歸殯之賊執熙子澄與妻黃詣賊請曰吾李亡矣僅此一孤願以子代賊義並釋之澄沒渙持家秉大書孝友二字于堂曰父訓也吾兄力踐之吾其忍忘拮据聯屬建置祠田與子姪公財無私萬曆中三房五世中外六十餘人尚未分異有司旌之

吳汝韜嘉靖三十七年倭寇入境首率子廷爵姪廷喬廷蘭應縣令募手刃倭首二人益與子姪力戰死縣令聞痛憤欲身督戰賊乃懼遁事寧令旌其一門忠義給地葬之程伯簡嘉靖丙辰倭萬餘攻堡伯簡編甲伍選游兵精壯前梁弱者次之婦女裹首運石傳餐立于後倭更番挑戰七晝



夜伯簡誓衆死守倭見衆皆稟命伯簡知其爲魁首也爭向射之伯簡殊不撓沮賊馳二雲車至伐樹杈格使不得薄堞遂以草烏弩及銃斃數倭倭乃宵遁伯簡死城上鄉人李春榮等爲立祠并共難四十餘人並祀之

又卷之一百四十

閩閩志

福州府 閩縣

趙天麟妻方氏居長灣嘉靖中倭入長灣天麟出禦舉家浮江賊突至舟驅天麟父母入水方與天麟妹坤淑同時投水死

陳九叙妻吳玉蓮嘉靖己未爲倭寇所獲驅之不行罵不絕口延頸受刃賊遍斫其膚去扶歸逾數月卒時年二十五

林師學妻廉氏與吳玉蓮並時不汙賊死

許鐸妻吳氏倭寇長樂夫婦俱見執賊挾刀睨鑑吳抱鑑哭請代賊遂殺吳

林佺妻何玉真倭夷入寇佺父子被執賊質佺求賂不得遇害玉真遂自殺

又卷之一百四十一

閩閩志

泉州府 晉江縣

諸生王式妻吳氏嘉靖己未避倭大登寨中寨陷被擄罵不絕口賊怒將殺之有告賊曰此大家妻可挾以索贖乃令嫗扶之行適道旁有泉深數丈遂投而死人名泉曰義泉  
蔡士訓妻洪四娘年二十二嘉靖己未避賊大登嶼中反遇



賊賊迫之行頓坐於地拾瓦石擊之厲聲哭罵賊怒殺一婢  
恐之不爲動已又殺其女及二稚子愈益哭罵賊度不可脅  
乃刺之中胃洞膈無血賊怪駭而去時同避賊者伏翳莽中  
共憐其死爲埋屍淺沙中比賊退已四十九日士訓發殮顏  
色如生

海澄庠生林鳳翔妻葉氏年二十夫亡事姑孝謹嘉靖季倭  
入寇葉歸襄父喪與衆婦避賊涉淺溪猝遇賊衆婦被執葉  
獨抗不就賊刃其胃大罵曰死賊何不速殺賊剝唇吻猶罵  
不絕死之

郭民守者椿姪孫民守以軍舍人死倭計至妻楊欲死矣以  
有身強粥旣得雌所親諷之更嫁唾不顧也姑陳氏或微贊  
之揚久閉視不言轉面瞳目曰媪亦出此言耶陳曰身故孀

婦何敢敗爾志立繼可乎輒曰婦大與媪異媪子婦否居三  
月竟死年二十

歐陽寨本衛人嘉靖季倭陷城寨妻與其姑及其夫弟被掠  
而有諸生楊敬中者其家西賓也亦在掠中賊俱閉諸人房  
室中寨妻欲死恐無計出其姑與其夫弟語敬中曰願君以  
婦私我告賊質婦君目求與吾姑及吾夫之弟出曰且圖金  
爲贖賊悅婦艷信而許之度行旣遠持刀黥面罵賊不已賊  
怒焚之於火中

永寧衛前所百戶朱冕妻陳三娘嘉靖間值倭亂冕血戰陣  
亡三娘年二十七欲死殉之念姑在四十年倭陷永寧城挾  
姑逃難被賊面斫一刀姑病孝養湯藥姑歿稱貸資塋  
又一百四十二



閩閭志

建寧府 建安縣

葉氏姑娘者江華之妻而陳應娘葉弟惠勝妻也二婦貞潔和順守貧苦節嘉靖四十一年十二月同里人避倭寇匿長潭值年夜里男覓刀剃頭弗得姑娘乃出諸懷眾婦問故姑娘曰設有急可自裁也獻歲四日倭圍長潭執姑娘應娘共繫一繩姑娘謂應娘曰我二人今日被虜縱生還潔亦名汚不如就斃應娘唯唯姑娘探刀懷中則已墮失於是各抱幼女連繩跳潭水中

林壽妻范惠女嘉靖四十一年臘月與眾婦避倭匿廖墩山塢賊掠山執惠女及眾婦至水南獨惠女與抗或謂今且順之家中來贖矣惠女曰可贖身也可贖辱哉我則寧死賊見

言殺其幼女以懼之惠女自如曰併及汝矣曰固所求也賊殺之

又卷之一百四十四

閩閭志

興化府 莆田縣

嘉靖壬戌與倭難者四十三人四十一年倭陷興化城與難者四十七其事可表其志繳如也庠士林觀願妻柯氏倭圍城語妯娌曰城陷矣賊至被執至顧提學池亭賊稍侵之遂赴水歿庠士林須恭妻劉氏年二十六姿貌殊麗賊強侵之劉抗拒刃刺其腹同俘者見其屍仆地猶手執視襠賊感動為之具棺殮高翰妻翁氏賊入城翁抱姑哭賊殺姑礪刃翁頸曰不從砍矣翁伸頸罵曰賊奴便砍何可從也賊



復殺其幼子而擬以兵曰砍矣翁復罵曰姑歿子歿吾獨生乎伏姑屍大哭遂被害陳復拱妻黃三姐年十七垢面冀免污賊獲逼之梳洗黃哭罵奮前奪刀賊大怒拽之出黃且指且罵賊擊之五指俱落仍刺殺之同俘者覆以青袍積薪焚其屍知縣鄭文煥繼室郭氏賊執欲污之厲聲罵遂遇害魚臺尹鄭任妻陳氏賊入城時卽投井家人救出之同夫被執入營奮必歿旣而夫釋獨留遂罵賊歿歸殯之顏色如生知縣黃約妻高氏城陷抗賊歿節庠士蘇繼茂妻唐氏城圍急指後庭井中謂賊獲曰城陷此吾歿所矣倭入城盡室逃竄唐氏投井歿鄉貢士方繼曾妻林氏夫歿貧且無子忍歿養舅城陷亟扶舅縋城舅老悖不能下乃垢面男髻扶舅歸伏其夫棺側賊獲之笞舅請以身代賊兩釋之

戒諸黨勿焚其居庠士周大佐妻游氏城陷被執賊責贖金露刃臨之游無懼色偵他賊過欲以金代贖游罵愈厲遂被害廩生鄭東野妻陳氏年二十五賊入城卽投井家人救出之同夫被執罵賊死庠士林觀文妻陳氏年二十四守志又四年被執不屈賊生縛而投之火中庠士鄭肇妻鄒氏肇被賊執舅引姑及鄒匿鄰舍天明賊獲之逼使前鄒奮曰死卽死不可前也賊怒刀刺洞胸血被地猶屹然坐姑驚號賊斫姑頰愈憤罵激烈賊刺其喉歿庠士宋茂淳妻張氏賊逼之具脂粉使自飾張號罵盡碎其具賊欲刃之受以頸乃禁之密室潛自牖出抱乳兒下井死庠士李啓謨妻黃氏方盛年賊至匿其男雞櫛中覆以麥草與二女赴水死州判黃采妾朱氏張氏城陷朱自經死張與采被執賊



屢犯不從，執采焚之。張自投烈火死。朱年二十五，張年二十，李塗妻陳氏塗嬰疾，陳事姑甚孝。年十九，倭執而逼之，罵賊投水死。庠士鄭日新，妾蕭翠鬢，與其婢同爲賊執，曰：「吾必死之。」卽以所生子付其嫡妻，既至，賊逼之，不從，佯欲殺之，卽引頸受刃。如是者三，婢勸之曰：「何自苦乃爾？」怒罵愈厲，賊刃之。吳緒妻鄭氏，年二十八，夫亡，勵節，城陷死焉。林文鉞妻王氏，早寡，撫孤有孫矣。城陷，遇賊，賊欲刃之，孫廷準曰：「祖母守節，請殺吾賊。」殺準，王得釋。準妻黃氏，絕城道入山，聞夫訃，不食死。準弟廷漑以護幼弟出城，爲賊所殺，未娶。婦鄭氏適被繫，亦自投白馬潭中。黃懋志，繼室翁氏，莊重美姿，賊見而悅之，給以更衣，自縊死。王大勳妻張氏，年二十二，夫亡，姑老，自吃糠覈，以米啗姑，遺腹生男，撫教之。賊入城，與

婦朱氏扃門燔死。吳應桓妻陳氏，年二十七，寇獲之，大號曰：「一死便休，從汝虜耶？」仆地不起，賊斬之。黃士寵妻陳氏，士寵宥也，陳爲俛拾，取生有男女矣，而士寵歿，閨舅欲嫁之，涕泣踰庭，自明志，義亡。何男女夭喪，志節益堅，賊且至城中，屢驚語人曰：「吾聞死而無辱，則魂魄不媿，竟被擄赴水死。」郭景順妻何氏，年二十五，猝遇賊，勤之不從，欲兵之，曰：「不可辱賊。」五舟聯爲一舟，縛何氏出，刃摩其頸，以示同俘。諸婦時冬，方衣絮絮，領故厚，何自抑衣領，伸頸受刃，嫚罵，祈死。賊怒，殺之，投屍海中。鄭若濟居江口，倭至江口，妻蕭方入城，若濟遇害，計聞哭投江橋死。阮有道妻黃細娘居海上，聞倭警，携二子附舟避之，賊追至，赴水死。有道從弟道充妻陳氏，遇賊亦赴水，年俱二十餘。蕭奇烈奇照兄弟也，其



二婦皆林氏同孀共節倭至城二婦相語曰吾二人娶居十年不可辱也當求所以生二孤耳奇照妻縋兒城外投城下從之奇烈妻則毀面易乞人服從城門出奇照妻足傷尋卒奇烈妻被傷仆地力獲其兒居月餘亦卒 雍士憲妻林氏倭臨城姑方臥病林不忍去姑賊至將殺姑林請代賊見林色悅之免其姑縛林去至渠河林紿曰不須縛也願自行賊信而解之遂投河死 陳在良妻方邵娘城陷與姑若夫出避賊賊擁至姑若夫俱相失賊逼之邵娘罵賊投河死 林承芳妻鄭氏遇賊罵不從賊怒割其左耳罵愈厲復割其右耳又復罵賊大怒割鼻逐之 劉氏二女被倭擄繫入知府林介祠中倭飲而酣遍視繫中得二女出之姊妹也姊年可十七八有殊姿倭先取姊姊厲聲曰我名家女也肯污賊倭

莫知云何詢舌人具以對倭微笑命慰之曰若從我終當詢父母歸汝耳女曰父母未可知此時尚論歸耶倭知其不然以姿故乃撫背作款語狀女雄視罵益甚時黃昏倭方縱火女即赴火死已復侵其妹妹大罵曰我姊爲汝死我豈汝汚夷雖不辨其音然見其色厲甚露刃脅之女不爲動曰死即死倭無可爲計欲強犯之女知之紿舌人曰吾固願從姊屍未化吾不忍也化姊屍從汝矣倭聞譯言有喜色身負薪爲諸酋先火熾女又赴火死倭恚甚連創其膚殺其被逮四五人以洩怒 黃河妻陳氏河陷賊賊質以索鏹陳氏遍過宗人無所得乃自入虜圍請代告賊曰必放夫出鏹乃可得逾旬河不至賊以爲紿已引出割其乳立斃 西門女子者賊至匿西門涵竇中賊得之據地不起賊怒刺其喉四五日顏



色如生但頭微俯如支頤之狀 二州女姊妹也賊欲汚姊姊厲聲大罵偵火發遂赴死已而意及妹亦投火從之賊吐舌去 溝頭地嫗者賊將殺一男子嫗固抱持云夫也賊奪而殺之嫗拊屍哀血哭移時亦被害 北門嫗者賊殺其姑抱哭同死 水關南女子者賊執之罵賊賊斫女子舌寸斬焉 後村婦人者容色甚盛不受賊污曰請受刃賊戀之置之房乃自垢其面請死甚切賊不忍復以火燬面皮決之如癩賊舍之 釘壁女子者抗賊不屈賊釘其手足於梅峰寺前之壁間以死 槐樹下女子與父同執賊欲質其父取贖金女曰吾女流無能爲也可放吾父賊出其父女知父貧無所取金遂代父死 衣紅女子丘家女也容色麗都賊住西洲得之厲聲罵賊死 鄉貢士蔣龍妻林四娘龍計借卒旅邸

四娘年二十二無子勵志艱貞事姑甚孝時海賊蠶起扶姑匿山谷間遇賊驅至水塘挺身投之載沈載浮賊以矛鉤置膝上氣絕移時復生數載姑沒推衣被爲殮薄形度寒三食不給及卒御史何淳之禮葬之又卷之一百四十五

閩閩志

福寧州 寧德縣

知縣左承芳妻陳氏倭賊陷城舅姑老病陳氏以身先後卒全其命承芳見縉紳 庠士龔佐妻左氏子邦卿甫五歲佐與父繼亡內外無靠左舉三喪重遭回祿孤苦酸辛日夜紡績課邦卿讀書仕爲訓導其後遇倭變赴水死邦卿見縉紳 庠士林文珽繼室謝氏二十于歸甫二年珽病篤一子胎



髮未燥，文珽謂曰：能終事乎？謝掩泣，剪髮示珽。未幾，倭賊充斥，抱孤子奔竄，凍饑荒山草莽中，竟以撫孤而完節。嘉靖中，與倭難者一十七人：庠士林鴻漸妻崔氏，倭擄不從，見殺身磚地，已而屋燬屍焚，天陰雨，其形宛然著磚。庠士林執中妻吳氏，執中被擄，吳以身衛執中，得脫。吳斷兩截。庠士林邦京妻陳氏，崔允約妻薛氏，崔文泰妻林氏，陳韜妻黃氏，徐元呂妻龔氏，俱被倭刃者。林文奎妻何氏，陳翰妻林氏，曹逞妻謝氏，林若山妻周氏，林二陽妻阮氏，林金妻何氏，俱赴水者。庠士黃煜寡妻林氏，赴火死。林示纘未婚妻陳淑慈，彭瀾未婚妻陳愛婉，湯目進未婚妻陳繼靜，俱自刃以殉。今按及我皇綱解紐，足利失威，頑民入中國殺越不止。

犯人婦女瀆我禮義之名，是可忍乎？中國生靈之塗炭，忠臣孝子輕命烈婦之死節，令後之人淚濕巾。

又卷之一百四十六

島夷志

日本古倭國在東海中，縮波而宅，自玄菟樂浪底於徐聞東莞所通，中國處無慮萬餘里，其地東高西下，勢若蜻蜒。古亦曰蜻蜒國也。國君居山城，以王為姓，以尊為號。徐福齋五百童男女入海為秦始皇求仙，無所得，懼不敢歸，避居焉。今其裔也，所統五州七道三島為郡，五百有奇，皆依水嶼，大者不過中國一村落而已。戶可七萬餘，課丁八十八萬三千有奇，而攝摩伊勢若佐博多，其民相矜以賈積貲，或百萬和泉，一州鼎食擊鐘，謠俗有中國之風也。薩摩之鸚哥里，其民備禮。



重爲邪，獨伊紀之頭陀僧三千八百，頗羯犍者，殺而薩摩肥後長門三州之人最喜入寇，諸州郡統於山口，豐後出雲三軍門，三軍門相掬，剽國分爲三，而總屬山城君。以後豐後獨強，國人服之，愈於山城。其朝貢始末，具載前史。元時世祖遣黑的趙良弼等，諭之不至，使將將十萬兵往征，風覆其舟於蛇海，終元世不相通也。高帝卽位，方國珍張士誠既誅，服諸豪亡命，往往糾島夷入寇。山東奄海諸郡，帝以卽位之二年，使行人楊載諭其國王良懷，賜之璽書曰：上帝好生而惡不仁，我中國自趙宋失馭，北夷據之，凡百有心，莫不興憤。辛卯以來，中原擾々，爾時來寇，山東乘胡衰耳。朕本中國舊家，恥前王之辱，師旅掃蕩，垂二十年，遂膺正統。間者山東來奏倭兵數寇海邊，生離人妻子，損害物命，故脩書特報，兼諭越

海之繇。詔書到，日臣則奉表來庭，不則修兵自固，如必爲寇，朕當命舟師揚航捕絕，島徒直抵王都，生縛而歸，用代天道以伐不仁。惟王圖之，良懷得之，不至復寇。山東轉掠溫台明州傍海，民遂寇福建沿海郡，上復使萊州同知趙秩責讓之。良懷遣其臣僧祖來隨秩奉表稱臣，上賜文綺帛，若僧衣，遣僧仲猷克勤等八人護送還國，賜良懷明曆雜繒，是爲洪武四年。然其人時時剽掠海濱，不絕。官軍乏舟，不能追擊。五年命淞江福建瀕海諸衛造海艘，德慶侯廖永忠請增造多槽快舡，來則大船蕩之，快舡逐之上，曰：善居久之，丞相胡惟庸得罪，懼誅，欲借倭人爲不軌，惟庸已敗，又久之，事覺，上追怒於是，名日本曰倭，下詔切責其君，臣暴其過惡，天下著祖訓絕之。而命信國公和江夏侯德興經略海上，郡成祖卽位國



王名道義者獲擾邊魁醜以獻蒸之海上上嘉之四年以俞士吉爲都御史齎賜之龜鈕金印誥命封爲日本國王名其國之山曰壽安鎮國上親製文勒碑其上遂給勘合百道令十年一貢貢道繇寧波船無過二隻人無過二百然倭狡易叛亦復時時寇略東北邊顧其時我方招徠海外諸夷頗得賚給互市倭國入貢亦時踰額宣德初復增例船三隻人三百是倭往往載方物戎器行海上爲詐欺得間則張其戎器不得則陳其方物無所不得利至其小小抄盜或不絕其主良不知也要以利給賚互市其貢常先期至至正統中乃入桃渚犯大嵩海濱人絕苦於是朝廷命重帥恒鎮要地以備之按堵者且十餘年成化二年復詐來稱貢遂破大嵩諸處十一年復使貢及歸閩帥用金鼓送之出海隨以砲銃擊其

舟多沈者正德中郵人朱縉變姓名爲宋素卿亡入其國國王源義澄悅之遣入貢素卿與其故族人耳目爲奸利厚賂關瑾得賜飛魚服以歸嘉靖二年其西海道大內誼興國遣僧宗設入貢居數日素卿復爲南海道海川高國所遣與僧瑞佐以來皆止寧波江下故事番使止寧波有宴先至者居上素卿賄市舶太監義先閱貢宴之坐上坐宗設衆不平攻瑞佐殺之追逐素卿抵紹興城下素卿竄入慈谿縱火大掠指揮劉錦與戰死遂蹂躪寧紹間九年國王源義晴復附琉球使來言爲素卿乞宥罪并請復脩貢獻是時夏言爲兵科給事中言夷人仇殺之福皆起市舶禮部請罷之而日本貢使絕矣十八年復以脩貢請許之期以十年人無過百船無過三然諸夷嗜中國貨物至者率遷延不去貢若人數又恒



不如約是時市舶既罷貨主商家商率爲奸利虛值轉粥貨其責不啻十萬索急則投貴官家夷人候久不得頗構難有所殺傷貴官家輒出危言撼當事者兵之使去而先陰泄之以爲德如是者久夷人大恨言挾國王賞而來不得直曷歸報因盤據島中並海不逞之民若生計困迫者糾引而歸之時時寇沿海諸郡矣朝議置大臣兼巡潮福海道詔以巡撫南贛汀漳都御史朱純爲之是爲二十五年純至則嚴勾連主藏禁犯者戮無少假上章鑄暴二三貴官家浙人口語藉藉罪及建議主議之臣而欵人王直者少任俠多略一時惡少若葉宗滿徐惟學陳東王汝賢王激等樂與游而激爲直義子直姦出禁物歷市西洋諸國致富不貲夷人信服之貨至一主直爲僮純禁既嚴諸奸商藉是益負倭競貴直直無

所出招亡命千人逃入海推許二者爲帥引倭結巢霽衢之雙嶼港閩浙蠶起之徒益附之浸淫蠶食海上聚保矣純居浙二年盛集舟師雙嶼挑之不出會夜風雨將逸去純火攻之多所斬捕更令福建都指揮盧鏜儔之俘斬溺死者數百人餘黨遁入福建之浯嶼純帥鏜勦平之躬督兵衆填塞港口令不得復入當鏜破雙嶼時許二逸不得王直收合其餘衆更泊他嶼而廣東有海賊陳四盼者自爲一黨直許殺之扣關獻捷以求關市官司弗許賜米百石而已直大詬投米海中益入盜此時有滿刺加夷者故商漳州之月港障民畏純厲禁不敢與通捕逐之夷人憤起格鬪漳人擒焉純語鏜及海道副使柯高無論夷首從若我民悉殺之殲其九十六人謬言於朝佛郎機夷行劫至漳界官軍追擊于走馬溪上



擒得者純以厲禁爲制中二三貴官家所不樂先是言官業請改巡撫爲巡視以輕純權以消制人缺望之意至是御史九德劾純專擅濫殺詔罷純下鏜喬吏遣都給事汝楨卽訊訊報則滿刺加夷來市非佛郎機行劫者專擅濫殺誠如御史言詔鏜喬論死繫獄逮純至京師訊之純驚仰藥自盡從此當事者以純爲戒三十一年朝廷以王忬提督軍務巡視福浙許便宜從事以俞大猷湯克寬爲分守叅將其明年春破其寇溫倭閏三月大猷入烈港火賊營王直突圍去更集餘黨掠嘉定劉家河揚帆西六合知縣董邦政追及於吳淞直值採陶港賊與合遂復大料入寇羽書狎至浙東西及蘇松淮北諸郡直更造巨船連舫柵木爲樓櫓入倭據薩摩州之松浦津僞稱徽王部署宗滿惟學東爲將領汝賢激爲腹

心而三十六之夷皆其指使矣倭賊勇而顛每戰亦體舞刀前不復別生死大率狡悍善設伏能以寡繫衆而內地久寧目不見寇遇輒靡潰沿海諸郡僅僅保孤城賊往來聚散如入無人之境是年陷福建之秦嶼所矣此時忬請添設海防副總兵總督金山等處以克寬爲之出盧鏜爲福建備倭都指揮詔如忬言復改忬爲巡撫其明年正月倭攻嘉定圍上海陷嘉善犯海寧大掠蘇州轉掠崇德上命南京兵部尚書張經不妨原務兼右副都御史總督南直隸浙江山東兩廣福建等處會大同患虜上復用忬大同而以李天寵代是時倭大擾江南而經故總督兩廣有歲爲諸蠻夷所信服奏調田東蘭諸州狼土兵及承順保靖二土司兵備前行所調兵未至經持重未卽戰而朝廷遣工部侍郎趙文華出視師劾



經養寇玩賊逮死西市是爲嘉靖三十四年先是徐惟學者  
貨夷人金以其姪子海爲質惟學死夷求海金令取償於寇  
掠海乃偕辛五郎聚舟結黨入南畿浙西諸路是時應天巡  
撫都御史爲南京戶部右侍郎揚宜而天寵以怠廢黜代之  
者胡宗憲也此時倭大猖獗江以南其冬復有一百餘人犯  
福建莆田縣鎮海鎮東等衛泉州指揮童乾震所與戰死於  
海口者也蓋閩中犯倭自此始先是賊未寇輒謬詭曰某島  
某倭東南人久知王直叛而不知寇來皆直所坐遣是歲朝  
廷立賞格有擒斬王直者封伯爵賞萬金於是遣生員蔣洲  
陳可願克市舶提舉入海說王直而是時徐海已擁薩摩洲  
夷入寇浙中戰敗於崇德宗憲復使人賄誘之海念欲歸恐  
諸酋疑怨宗憲使擇使地自營竟行間賊黨中復殺海其年

獻俘京師此時文華復以總督尚書視師至上則加文華少  
保宗憲以兵部右侍郎兼僉都御史上則擢宗憲右都御史  
兼兵部右侍郎云又一年宗憲計誘王直擒之上加宗憲太  
子太保云直雖已擒然其餘黨毛烈知無所歸尚據舟山阻  
岑港巢柯梅連犯吳越首尾巢閩中七八歲聞所破滅城十  
餘掠子女財物不可勝計官吏軍民戰及俘死不下數十萬  
轉漕軍食橫賞賜乾沒入橐中者費以鉅萬而東南膏髓竭  
矣是冬則又犯福州洪塘南臺等處巡撫都御史阮鶚坐逮  
繫罷爲民三十七年四月辛巳倭大至犯淞江台溫福建興  
泉等府丙申陷福清殺縣令劫庫獄擄男婦千餘攻惠安殺  
知縣林咸五月戊申入南安甲戌倭自福清海口出港叅將  
尹鳳等擊之斬獲溺死者甚衆十一月烈日柯梅駕舟出海



泊福建浯嶼復移衆南澳山造屋以居福興潮廣間紛紛以倭警聞矣三十八年又大至福建攻福寧州不克攻福安寧德破之福興泉漳無地非倭矣三十九年破永定城又破寧德縣殺叅將王夢麒知縣李堯卿興泉漳三郡城以外皆爲賊藪貧民無賴者竄入賊中爲之謀主羽翼掠行人發墳塚量其家貲索贖諸將帥冒功飾敗賊滿載歸者指爲逐道阻風旋者指爲遮擊上下相蒙遂成故事先後巡撫王詢以避難引疾去而劉燾貪縱欺誣厚賄分宜相言官交章論詆猶得以風土不便調外矣是年胡宗憲檄浙江叅將戚繼光來援繼光故訓練義烏兵有勇可使則率之求時倭據寧德之橫嶼沮水爲營官軍坐守踰年繼光令軍人持束草填河進力戰大破之生擒九百斬首二千六百餘焚溺死者無算奪

所擄三千七百餘人乘明剿福清牛田倭又大破之夜廻入興化連破其六十餘營而繼光復歸于浙四十一年八月新倭大至犯福清羅源連江等縣殺遊擊將軍倪祿十一月攻興化府陷之殺一同知奚世亮據城中者三月分衆攻陷壽寧政和其明年巡撫都御史游震得具陳失事狀上從部議起丁憂叅政譚綸統浙兵三千人往以副總兵戚繼光統義烏兵一枝而江西兵一枝則令撫臣自擇良將星馳應援震得尋被論罷陞綸爲僉都御史代之二月興化倭結巢崎頭都指揮歐陽深率兵追剿陷伏中死之賊乘勝陷平海衛引舟出海把總許朝光率輕舟抄之賊焚舟還屯平海衛四月繼光與總兵劉顯俞大猷夾攻大破之斬首二千二百餘級墮崖溺死水者無算縱所掠男婦二千餘人是戰也賊與顯



俞大猷對壘日久頗懈謂繼光遠來疲乏未能軍而繼光兵至如風火擒殺無遺興化人德繼光如親父兄興化圍解繼光分前將趨福州合擊長樂寇破之倭屯海上者盡遁殘寇五百繇北嶺窺莆城千總胡世驅之多赴海死四十三年繼光復擊仙遊殘倭破之賊趨同安繼光追至王滄坪又追及於漳浦之蔡丕嶺斬首千餘級其殘寇得脫者流入廣東令兩廣南贛徵調土兵大集急擊之賊掠漁舟入海遇風多覆溺乃復登岸屯海豐金錫都總兵俞大猷率兵圍之相守且二月賊食盡將遁報劾副總兵湯克寬設伏待之擒斬二千餘人自是倭寇絕自東南中倭以來十餘年間生靈之塗炭已極倭亦大傷至盡島不返隆慶時海上通寇曾一本等復稍稍勾引入犯閩粵我亦嚴爲備旋至旋撲非如嘉靖之季

矣萬曆中一使中貴人推州稅中貢搜求百出海禁懈弛市舶縱橫逐臭之夫且爭趨爲樂土又有亡賴如中行說者陰爲之畫東踐朝鮮之郊南設琉球之版雌伏梟張漸窺堂奧夫志止於剽掠則癘疥之憂志不止於剽掠則膏盲之患矣貢物曰馬曰盔曰鎧曰劍曰腰刀曰鎗曰塗金裝綵屏風曰灑金厨子曰灑金文臺曰灑金手箱曰描金粉匣曰描金筆匣曰抹金銅提鈔曰灑金木鈔角盃曰貼金扇曰瑪瑙曰水晶數珠曰硫黃曰蘇木曰牛皮

今按其地東高西下勢若蜻蜓古亦曰蜻蜓國者日本書紀曰神日本磐余彥天皇三十有一年夏四月乙酉朔皇興巡幸因登腋上喙間丘而廻望國狀曰妍哉乎國之獲矣雖內木綿之真迨國猶如蜻蛉之臀啗焉由是有秋津



洲之號也徐福云今其裔也甚妄詳見上卷源義澄足利政知之子義政之甥任征夷大將軍號法住院誼興誼與義同海川海當作細源義晴義澄之子也任征夷大將軍號萬松院薩摩州之松浦津非也松浦肥前州郡名呂宋條南倭北虜皆有文字類鳥跡古篆意其初有達人制之耶

琉球條萬曆二年遣給事中蕭崇業行人謝杰往皆禮如初然或倭亂或以風期待渡于閩凡三閱歲乃行使旋所錄極其往來險阻艱辛狀又其國貧無以給使者僉仗十九年復以嗣封請于時倭犯朝鮮海氛不靖令其使者自齎詔冊歸使臣罷勿遣更十餘年朝鮮師解復堅乞如故事上嘉其為不叛之臣復許之三十二年命兵科給事中夏子陽行人王

一禎往始杰冊封琉球還言其國有日本館羣聚數百人待封使之舟轉與市其人出入擁利刃琉球心懾之及子陽還復言日本近千人露刃而市琉球行且折於日本矣居一年其國王果為日本所執且欲代日本求貢於我中丞丁繼嗣直指陸夢祖因具疏請緩外貢脩我內備許之



一頁... 皇朝日本傳卷中四



